

顧氏文房小說

三

顧氏文學小說

山家清事目錄

相鶴訣

種竹法

酒具

山轎

山備

梅花紙帳

火石

泉源

山房三益

插花法

詩筒

金丹正論

食豚自戒

種梅養鶴圖記

江湖詩戒

山林交盟

山家清事目錄終

山家清事

可山人林洪龍發著

相鶴訣

鶴不難相人必清於鶴而後可以相鶴矣夫頂
丹頸碧毛羽瑩潔頸纖而脩身聳而正足癯而
節高頗類不食煙火人廼可謂之鶴望之如鴈
鶩鵝鸛然斯爲下矣養以屋必近水竹給以料
必備魚稻蓄以籠飼以熟食則塵濁而乏精采
豈鶴俗也人俗之耳欲教以舞俟其餒而寘食
於閑遠處拊掌誘之則奮翼而唳若舞狀久則

聞拊掌而必起此食化也豈若仙家和氣自然之感召哉今仙種恐未易得唯華亭種差強耳

種竹法

岳州風土記文心雕龍皆以五月十三日爲生日齊民要術則以八月八日爲醉日亦爲迷日俱有可疑比得之老園丁曰種竹無時認取南枝又曰莫教樹知先鉏地令鬆且闊沃以渠泥及馬糞急移竹多帶舊土本者種之勿踏以足若換葉姑聽之勿遽拔去又有二秘法迎陽氣則取季冬順土氣則取雨時若慮風則去稍而

縛架連數根種則易生筍過此謂有他法者難矣哉

酒具

山徑元以蹇驢載酒詎容母具舊有偏提猶今酒鼈長可尺五而匾容斗餘上竅出入猶小錢大長可五分用塞設兩環帶以革唯漆爲之和靖翁送李山人故有身上祇衣簾直掇馬前長帶古偏提之句今世又有大漆葫蘆隔以三酒下果皿中上以青絲絡負之或副以書篋可作一担加以雨具及琴皆可較之沈存中游山具

差省矣唯酒榷當依沈制用銀器一

山輜

夏禹山行乘輜漢南粵王輿橋過嶺顏師古北人固不知南人乘輜度嶺而洪景廬亦謂山行之車車只宜平地孰若今輜爲便橋即輜固無疑矣若山輜則無如今廬山建昌高下輪轉之制或施以青罩用肩板棧繩低與之猶今貴介郊行者良便遊賞有如謝屐上山則去前齒下山則去後齒非不爲雅孰若今釘履爲便云

山備

山深嵐重仙道未能生薑豈容不種每旦帶皮生薑細嚼熟酒下之或薑湯亦可矣

梅花紙帳

法用獨牀傍植四黑漆柱各掛以半錫瓶插梅數枝後設黑漆板約二尺自地及頂欲靠以清坐左右設橫木一可掛衣角安班竹書貯一藏書三四掛白塵一上作大方目頂用細白楮衾作帳罩之前安小踏牀於左植綠漆小荷葉一寔香鼎然紫藤香中只用布單楮衾菊枕蒲褥乃相稱道人還了鴛鴦債紙帳梅花醉夢間之

意古語云服藥千朝不如獨宿一宵儻未能以
此爲戒宜亟移去梅花毋汚之

火石

語曰鑽燧改火化書云陽燧召火方珠召水燧
日中取火鏡也入夜則當以石今崑山石也或
竹木相戛如鋸木然亦可矣必先焚紙在於鉢
中候之如法燭及燈皆所當備若能拾乾薪掃
落葉以儲之尤見有徹桑未雨之意

泉源

臘月剖脩竹相接各釘以竹丁引泉之甘者貯

之以缸杜甫所謂剖竹走泉源者此也又須愛護用之諺云近水惜水此實脩福之事云

山房三益

秋采山甘菊花貯以紅蒸布囊作枕用能青頭目去邪穢采蒲花如柳絮者熟鞭貯以方青囊作坐褥或卧褥春則暴收甚溫燠雖木綿不可及也采松樛枝作曲几以靠背古名養和

插花法

插梅每旦當刺以湯揷芙蓉當以沸湯閉以葉少頃揷蓮當先花而後水揷梔子當削枝而揷

破挿牡丹芍藥及蜀葵萱草之類皆當燒枝則盡開能依此法則造化之不及者全矣

詩筒

白樂天與元微之常以竹筒貯詩往來賡唱和靖翁故有帶班猶恐俗和節不防山之句每謂既有詩筒可毋吟箋以助清灑一日許判司執中遠以葵牋分惠綠色而澤入墨覺有精采詢其法乃得之北司劉廉靖躡采帶露葵葉研汁用布擦竹紙上候少乾用溫火熨之許嘗有詩云不取傾陽色那知戀主心此法不獨便於山

家且知二公俱有葵藿向陽之意又豈不愈於
題芭蕉書柿葉者乎

金丹正論

金取乎剛丹取乎一不剛以戒慾不一以存誠
豈金丹乎有如純乾即丹也自強不息即金也
苟能剛毅以行吾誠則此丹可以存諸身而施
諸天下豈小用哉如欲舍此以求法不過欲知
玄牝之門耳非鼻非口非泥丸非丹田惟內腎
一竅名玄關外腎一竅名牝戶牝戶母所感觸
則精不外化而後玄關可以上通既通則精氣

流轉於一身而復于元又能凝神調息以養之
至於調息心靜則天地元氣自隨節候以感通
久而不爲物奪自可以漸入天道過此又欲求
三峯黃白之術此愚夫也何足以語道蓋自古
以來未嘗有貪財好色之神仙云

食豚自戒

僕舊苦臟疾偶遇人語曰但不食豚足矣試之
一歲果爾按本草云其肉不可食令人暴肥而
召風又耗心氣又文人尤所當戒且食多忌吳
茱萸白花菜蕎麥皆不可同食由是久不食而

他病亦鮮且覺氣爽而讀書日益悟始信不食
豚之功大或曰事祠山者當戒此恐未有所據

種梅養鶴圖記

擇故山濱水地環籬植荆棘間栽以竹入竹丈
餘植芙蓉三百六十入芙蓉餘二丈環以梅入
梅餘三丈重籬外植芋栗果實內重植梅結屋
前茅後瓦入閣名尊經藏古今書中屏書堯舜
之道孝弟而已矣夫子之道忠恕而已矣字進
二丈設長榻二中掛三教圖橫扁大可山字上
樓祀事天地宗親君師左塾訓子右道院迎賓

客進舍三寢一讀書一治藥一後舍二一儲酒
穀列農具山具壁塗澤以茅書田所畝三十記
歲入一安僕役庖富稱是童一婢一園丁二前
鶴屋養鶴隻後犬十二足驢四蹄牛四角客至
具蔬食酒核暇則讀書課農圃事母苦吟以安
天年落成謝所賜律身以廉介處家以安順待
下恕交隣睦爲子子孫孫悠久地先大祖瓚在
唐以孝旌七世祖逋寓孤山國朝謚和靖先生
高祖鄉材曾祖之召祖全皆仕父惠號心齋母
氏凌姓今妻德真女張與自曰小可山家塾所

刊魏鶴山劉漫塘所跋經集大雅復古詩集趙
南塘趙玉堂序跋西湖衣鉢樓秋房跋文房圖
贊真西山跋詩後趙南堂跋平衢寇碑謝益齋
史石窓陳東軒書梅鶴圖王潛齋擬晉唐帖并
寄詩陳習庵諾薦書唐宋詩律施芸隱詞扣閣
奏本十上都賦一續諷諫篇三十所藏當世名
賢詩帖不計百江湖吟卷不計千先和靖遺文
二祖收五斤鉄簡一誥勅存三十汀洲兄文雅
禪書一家傳慈湖太極圖以辛卯火不存其欲
求趙子固水仙未能也手抄經史節二論策括